

Baluwa jha Pauli kwa Titu Ulongolelo

Kitabo chenje cha Titu ndi chimo pakate jha itabo ncheche ya Pauli, yajhandike kwa mundo jhumo jhumo papalita kulijhandikila lilongo lya bhando lilinnyeketii Kilichitu. Baluwa henge itato ndi Timocheyo jhukutumbula na Timocheyo jhubhele na Filimone. Pauli anyandikila Titu baluwa jhenje, nambo ipalitwa ichomwa kanonoya pa bhando bhoha. Tuhotwi kumanya lende nhwalo Pauli achimulila ghoha ghighanteila abhehe ntenga, kilebhe cheneche Titu akibha akimanye njwe. Pangejhe baluwa jhenje ikajhandikwe na Pauli muchaka cha makome chita na matato ade mu makome chita na nhwano kubhoke mukubhelukwa kwa Yecho Kilichitu.

Pauli nganaghila Titu ghukalongocha malongo gha bhando ghighannyeketii Kilichitu ghighabhii mu kilendela cha ku Kelete. Pauli akajhandike baluwa jhenje kupala kunaghila Titu kwahaghula na kwabhola ilongoche ibhii mu lilongo lya bhando bhibhannyeketii Kilichitu. Ngalaghila malaghilo ghighalandana ghala ghighabhii mu baluwa kwa Timocheyo. Baluwa jhake jhipalita ilongoche ya lilongo lya bhando lalinnyeketii Kilichitu ipalwa bhatama na kuhenga mahengo maha hake. Malongo gha bhando ghighannyeketii Kilichitu na ilongoche yabhe bha

ngohe bhupalwa kutenda na kukamuu ghoha ghighapalwa mulongoche.

Ghughabhii mukitabo

Pauli inaghalikiya Titu kuhaghuu bhando bhibhahenga ghapala Chapanga kubhehe ilongoche, mu chula jha 1:1-16.

Kabhele Pauli inaghila Titu kwabhola bhando bhibhatama ngita Chapanga, mu chula jha 2: 1-3:11.

Pauli ijhomolela kujhandika baluwa jhake na kulangii mipangu jhake na kwajhambucha, mu chula jha 3: 12-15.

¹ Ne Napauli natumiche jwa Chapanga na ntenga jwa Kilichitu Yecho.

Nenga aghulilwe na ndumitwe kwalongocha bhando bha Chapanga bhabhehe na kihobholelo na bhaumanye uchakaka na kutama ngita chapala Chapanga,

² uchakaka gwenio utupela lihobholelo lyakubhehe na ughome gwa machiko ghoha ghangapeta. Chapanga jwangalonge uwange ngatulaghila ughome gwenio kabula jha kutumbuu kwa ipinde,

³ kipinde chamaha, ndi ngauyekwila uchakaka mu lilobhe lyake. Na nenga mbatite lilobhe lyenio, ndangache kwa kulaghilwa na Chapanga, Nkomboche gwito.

⁴ Ninnyandikii mwenga ma Titu, ma mwanango jwa uchakaka mu kihobholelo tubhii pamonga mwenio.

Umbone na uteeke kuumii kwa Chapanga Tate na Yecho Kilichitu, Nkomboche gwito ubhaha pamonga na mwenga.

Lihengo lya Titu ku Kelete

⁵ Nikannekite ku Kelete mbata nnyomolele mahengo kwenio na kwahaghuu akanahota ilongoche ya bhando bhibhannyeketii Kilichitu kuhumii mu kila muche. Mighakomboka malaghiloghango,

⁶ munahota jwa bhando bhibhannyeketii Kilichitu ipalwa akoto kukokolekewa kwa kilebhe chochoha, jwabhii na mwikeghe jhumo tugha na yana mundo ipalwa ibhaha inhobholela Kilichitu na jwangabhehe na milomo amu ngandango.

⁷ Nhwalo kilongoche jwa bhando bhibhannnyeketii Kilichitu ndi nnyemelela lihengo lya Chapanga, ipalwa abhaha mundo jwangamalemo. Jwangaloka, jwangabhehe na lilaka kajhombe na jwangalobhela na jwangamilomo na jwangapala mbijha kwa ndela mboho.

⁸ Nambo ipalwa kubhehe mundo jwabhapoke akaghene mbone na mundo jwapala ghambone. Ipalwa abhaha mundo jwakilongocha jwenio, jwabhii jwaumbone palonge jha Chapanga na jwa nyahinyahi na jwakilongocha.

⁹ Ipalwa aghakamulikiya pyee mabholo ghakuhobholeka ngita chimolitwa. Peniya ndi nahotola kwangamalicha mwojho bhando bhange kwa mabholo gha chakaka na kughayekula malemwa gha bhando bhala bhibhakana mabholo gheniya.

¹⁰ Nhwalo bhabhii bhando bhamahela achwa bhahumii mu dine jha Kiyahude bheniya bhikana kujhokanikiya na bhilonge ghangandela na bhabhoghine bhando bhange.

¹¹ Bhando bhamba bhipalwa bhakoto kujhangula, nhwalo bhatindighana bhando bhoha munyumba jhoha kwa kwabhola malobhe ghangapalwa kubholwa, bhihenga naha kupala bhapata mbijha.

¹² Helahela nnondole jwabhe jhumo, ngalongila, “Akakelete bhilonge uwange machiko ghoha, bhabhii ngita inyama yakujhoghoha, kujhima na kunyela na utotoho!”

¹³ Na jwenio akalongii hotuhotu, yenio mwalakalila hake, kupala bhajheme nganganga mu kihobholelo.

¹⁴ Bhangajhendalela kukengama omo yuwange ya Akayahude amu mabholo ghibhapiya bhando bhibhakana uchakaka.

¹⁵ Yene, kila kilebhe chamaha kwa bhando bhibhabhii na mwojho gwamaha palonge jha Chapanga, nambo kibhii jhe kilebhe chamaha kwa bhala bhangahobholela Chapanga, nhwalo uhotolo gwabhe gwa kuhaghuu kuhenga lyambone amu lyanganandela malango ghabhe ghatundan-galile.

¹⁶ Bhando bheniya bhilonge bhaumanye Chapanga, nambo kwa itendwa yabhe ilangii bhinkana. Bhando bheniya bhanganandela na bhajhokanikii jhe, bhambone jhe kwa lihengo lyolyoha lyambone.

2

Mabholo gha uchakaka

¹ Nambo kwa mwenga mipalwa kubhola mabholo gha uchakaka.

² Malobholela akanalome ighogholo bhatemu-lana maha ilebhe na bhando bhibhatopela na bhikilongocha bhene, na kubhehe telatela mu kihobholelo cha uchakaka. Bhabha na upalo gwa uchakaka nu uhimbililo gwa uchakaka.

³ Helahela mabhole imbujha bhabhaha na matyangilo ghighanhalalicha Chapanga, bhangabhe bhibhing'wenyana amu bhakoto kulobhela. Nambo bhipalwa kubhola malobhe ghambone palonge jha Chapanga,

⁴ kwabhola achikabhale bhapale akangana bhabhe na yana yabhe,

⁵ bhahoto kukilongocha bhene na kuhenga lyambone palonge jha Chapanga, bhajhemelele maha nyumba yabhe bhabhehe bhaumbone na kwajhokanikiya akangana bhabhe, kupala Lilobhe lya Chapanga likoto kupuchwa.

⁶ Helahela mwaleke mwojho achikangombo bhahoto kukilongocha.

⁷ Mu ilebhe yoha mipalwa mme nnandanikiho kwa kuhenga ghambone. Mmole kwa uchakaka na mabholo ghino mughakamula mbone.

⁸ Mmole uchakaka kupala mabholo ghino ghakoto kukanwa na akamakoko bhino bhakola hone, nhwalo kibhii jhe kilebhe chakulonge changanandela panane jhino.

⁹ Mabhola akabhanda bhipalwa kwa-jhokanikiya akanahota bhabhe na kwahalalicha mu ilebhe yoha. Bhangataungana nabho jhe,

¹⁰ amu kwajhibhila ilebhe yabhe. Nambo bhipalwa kwalangiya kubhehe bhaumbone na kuhobholeka mu mahengo ghabhe ghoha, ku-

pala mabholo gha Chapanga Nkomboche gwito ghalumbililwe na bhando.

¹¹ Nhwalo kwa umbone gwa Chapanga ghuleta ughombokeko kwa bhando bhoha uyekulilwe.

¹² Umbone gwenio gwa Chapanga ghututenda tukoto kutama mu utamo gwanganhalalicha Chapanga, na tubhehe bhando bhitikilongocha, tutama mbone na tutame kwa kunhalalicha Chapanga mu nnema ghongo gwa ngohe,

¹³ kongo tulendelela lichiko lya kuhangana lituhobholela, peniya naupitila ung'alicho gwa Chapanga Nkolongwa na gwa Nkomboche gwito Yecho Kilichitu.

¹⁴ Yecho akakipihite jwenio kwa nhwalo gwa kupala atukombole kubhoka mugwanganandela ghoha na kutubheka mu nyahinyahi bhutubhii bhando bhake jwenio, bhando bhibhabhii na kilolo chakuhenga ghambone.

¹⁵ Bhahe, mmole mambu gheniya, kwa ukindendeke gwino ghoha na kwaleke mwojho na kwakelebhuya bhando bhibhannyokanikiya. Mundo jhojhoha angampucha jhe.

3

Kutama kwa kunkengama Kilichitu

¹ Mwakombocha bhando bhakitembekeya kwa ilongoche na bhando bhibhabhii na ukindendeke, kwajhokanikiya na kulenganikiya kuhenga ghambone.

² Mwalongolela bhangang'wenya jhe mundo jhojhoha, nambo bhatama kwa uteeke na kupalana, bhawachila bhando bhange na bhabhaha bhanuu kwa bhando bhoha.

³ Nhwalo makacho twenga tukibha jhe na malango, bhina lighoho na twanganandela. Tukibha akabhanda bha tama mbajha na kupala kila kilebhe. Tutamita mubhoho na wiho na bhando ngabhatuchimwita na twabhete helahela ngatuchimwina.

⁴ Nambo umbone na upalo gwa Chapanga, Nkomboche gwito puyekulilwa kwito,

⁵ ngatughombwila twenga chi kwa kilebhe chambone chituteila, nambo nhwalo akatukolii kiya. Kwa ndela jha Uhuke gwa Chapanga jwatu-tenda tubhelekwe uhyono na kutupe ughome nhyono kwa kutugholola kwa mache.

⁶ Chapanga ngatupila Uhuke gwa Chapanga lombilombi kwa ndela jha Yecho Kilichitu, Nkomboche gwito,

⁷ kupala kwa umbone gwake tujheketilwe palonge jha Chapanga kubhehe twaumbone kwa kutupeke ughome gwa machiko ghoha ghangapeta ghutuhobholela.

⁸ Kilebhe chinilongela ndi uchakaka.

Mbala nnongele kilebhe chenje kwa makakala bhala bhibhahobholela Chapanga bhabha na kilolo machiko ghoha kuhenga ghambone. Ilebhe yenio maha na ghatangatii bhando.

⁹ Nambo mibhambale mitaho jha undindilima na omo ya mahina gha akahoko kutaungana kwa nhwalo gwa Lilaghalikilo. Ilebhe yenio kibhii jhe chukujhambulila na kitangatii jhe mundo.

¹⁰ Mundo jwaileta mpechengano mukelebhuwa patumbula na mala jhuubhele, na kubhoke peniya muneke.

¹¹ Umanye kubhehe mundo ngita jwenio atei

kubhoghanwa na uhakaho gwake ulangii abhii na malemo.

Malaghilo gha kujhomolela

¹² Pinituma kwino mwenga Atemii amu Tikiko, nkachane kuhika kwa nenga kongo ku kilambo cha Nikapole, nhwalo amwii kutama kwenio machiko gha kipupwe.

¹³ Nghaghe kuntangatila Zena mundo jwali-manyii lilaghalikilo na Apolu kupala bhahotolo kutumbula mwanja gwabhe na nnole kila kilebhe bhakwete.

¹⁴ Bhando bhito bhipalwa bhakibhole kila kipinde kuhenga ghambone kupala kwatangatii bhando bhibhapalwa kutangatilwa, na kutama kwino kukoto kubhonekana kwanganandela.

¹⁵ Bhando bhoha bhibhabhii pamo na nenga bhinyambucha. Mwajhambuche bhando bhibhannyeketii Yecho.

Mabhoha ninnyope umbone gwa Chapanga.

Ndendeule

Ndendeule: Ndendeule (New Testament) for Tanzania

copyright © 2020 The Word for the World International

Language: (Ndendeule)

Contributor: The Word for the World International

The New Testament in Ndendeule Language.

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-01

PDF generated using Haiola and XeLaTeX on 1 May 2025 from source files dated 1 May 2025

463e1ded-27ea-5916-a8ed-170cdb8d87e3